

Mere Rab Mujhe Badnaamī Se Bachā

Zabur 25

Yā Allaah, main apne āpko tere hawaale kartā huñ. ⁽¹⁾

E mere rab, main tujh par bharosā kartā huñ, tu mujhe badnaam naheen hone denā.
Mere dushmanoñ ko mujh par hañsne kā mauqā n denā. ⁽²⁾

Jo koī bhī tujh par īmaan rakhegā wo kabhī badnaam naheen hogā.
Wahī badnaam hogā jo sirf gunaah kartā hai aur kabhī taubā naheen kartā. ⁽³⁾

Yā Allaah rabbul kareem, mujhe nek raastā dikhā.
Mujhe zindagī ko jeenā sikhā. ⁽⁴⁾

Mujhe apnī sacchī hidaayat atā kar, e mere parwardigaar,
mujhe nijaat dene waale, main terī hidaayat kā iñtazaar karuñgā. ⁽⁵⁾

E mere parwardigaar, tu apnī mohabbat aur karam yaad kar.
Jo tune ham par bahut pahale zaahir kiyā thā. ⁽⁶⁾

Mere gunaahoñ aur ġalat kaam ko yaad n karnā jo maine jawaanī me kie the.
Lekin mujhe pyaar karnā hameshā yaad rakhnā, kyunki tu behatreen hai, e mere rab. ⁽⁷⁾

Yā Allaah rabbul azeem, tu acchā aur sacchā hai.
Tu gunaahgaaron ko sach kī taraf le jaatā hai. ⁽⁸⁾

Tu unko hī sahī raastā dikhaatā hai, jo sahī kaam karne par ġurur naheen karte.
Tu unko apnā seedhā raastā dikhaatā hai. ⁽⁹⁾

E mere rab, terā raastā pyaarā aur sacchā hai
unke liye jo tujhse kie hue waade par amal karte haiñ. ⁽¹⁰⁾
E mere rab, apne naam kī kḥaatir, mere gunaahoñ ko baḥsh de. ⁽¹¹⁾

Allaah rabbul azeem apnī ibaadat karne waale bandoñ ko
behatreen raaste par le jaaegā. ⁽¹²⁾
Wo ek behatreen zindagī jiegā aur uske bacche zameen ke waaris hoñge. ⁽¹³⁾

Allaah taa'alā apne raaz use bataaegā jo uskī izzat karte haiñ.
Wo unheñ apne ahad ke baare me bataaegā. ⁽¹⁴⁾

Merī āñkheñ hameshā tujhe madad ke liye talaash kartī haiñ.
Tu mujhe har jaal se bachā legā. ⁽¹⁵⁾

Merī taraf dekh aur mujh par nazre karam kar.
Main akelā huñ aur bahut takleef me huñ. ⁽¹⁶⁾

Merī mushkileñ bahut baḍh gāi haiñ.
Mujhko merī mushkiloñ se āzaad kar de. ⁽¹⁷⁾

Dekh main kaise museebatoñ me phañsā huā huñ,
tu mere saare gunaahoñ ko maaf kar de. ⁽¹⁸⁾

Dekh mere dushman kitne zyaadā haiñ!
Aur dekh wo mujhse kitnī nafrat karte haiñ! ⁽¹⁹⁾

Merī hifaazat kar aur mujhe bachā le.
Main tujh par bharosā kartā huñ, mujhe badnaam hone se bachā le. ⁽²⁰⁾

Main tujhse hī ummeed rakhtā huñ
taaki nekī aur īmaandaarī merī hifaazat kar sake. ⁽²¹⁾

Yā Allaah, tu mere mulk ko har mushkil se mahafuz rakh. ⁽²²⁾